

So Grücht vom EU-Bitritt tüend sich rächt verdichte,
de Euro-Grichtshof chunt au bald zu eus go richte,
eus Schnitzelbänkler cha das scho no rächt verleide,
wänn au no fremdi Dichter alles tüend entscheide!

Ja d'Credit Suisse stürzt ab, jetzt isch s'Vertraue broche,
doch gfitzti Investore händ de Brate groche,
mit einre Ahlag häsch verdient no es paar Rappe,
mit dene alte, wiis-rot-blaue CS-Chappe!

D'Intelligenz wird künstlich, jede chas probiere,
s'wird alles generiert muesch sälber nüm studiere,
weg dem chönd eusi Hirnzelle jetzt nüm schnell tanze,
s'isch wie im Turne, ohni Training gids en Ranze!

Oha en Leu entlaufe all in Angscht und Schrecke,
mer suecht und meint sich nur en Wildsau am verstecke,
kein Leu, kein Wildsau, nei mir wüssed sich en andere,
nämlig Petra Gössi wo grad isch am wandere!

Dä Nachwuchs fehlt so chas de FC au nüm bringe,
kei Jungi do, drum müend die alte wieder singe,
so wird bi eus studiert, wils eifach guet tuet laufe,
öb mir defür de FC Wollerau wänd chauffe!

De beschi Trumpf, das isch de Buur, nöd nur bim Jasse,
au bi de Bundesratswahl tuet de Bruef guet passe,
d'Finanze stimmet und keis Budget isch meh drundert,
will sie chönd wiise mit vier Buure grad Zweihundert!

Vo Göschene in Gotthard ue zum Helde werde,
de neu Schueh vom Müller Willi macht Beschwerde,
erscht uf em Gipfel obe merkt er dänn bim ässe,
dass er de Schuelöffel im Schue in hät vergässe!

Bim Ueli Murer hani gmacht emal es Bsüechli,
zwei Trychle hani gseh und no es Globi Büechli,
im Hintergrund do isch es komischs Lied erklunge,
dä hani gemerkt de Blocher Stöffeli hät gsunge!

Ja Schindellegi das isch scho es schwiirigs Pflaschter,
sie gheied usem Rahme, passed i kei Raschter,
bisch det, willsch wäg, viel Zyt wo neu wirsch chöne spaare,
will mer jetzt chan dur de Turbochreisel fahre!

König der Löwen, Bambi, Nemo oder Flipper,
denn wenn kei Tierfilm luegsch isch s'Läbe scho chli bitter,
sie stönd bi jedem Kino z'überscht uf dä Lischte,
doch nur de Diethelm Beni mues defür i d'Chischte!

En Affezirkus das isch Politik chaschs glaube,
die meint scho sie chönget alles sich erlaube,
im Urwald chönntet doch die Type geschider bliibe,
denn müesteds nöd Banane no uf d'Spese schriebe!

Die edli Credit-Suisse duet ihres Geld verwette,
sowiit dass sie de Bundesrat sogar mues rette,
mir Turner sind au froh um eui Finanzsprütze,
sind zwar kei Bank doch händ defür liecht eine Sitze!

